

欽
定
全
唐
文

欽定全唐文卷七百八十一目錄

新文豐出版社藏書

李商隱 十一

爲舍人絳郡公鄭州禱雨文

爲李懷州祭太行山神文

爲安平公兗州祭城隍神文

爲懷州李使君祭城隍神文

爲中丞滎陽公祭全義縣伏波神文

爲中丞滎陽公桂州賽城隍神文

爲中丞滎陽公賽理定縣城隍神文

爲中丞滎陽公祭桂州城隍神祝文

賽靈川縣城隍神文

賽荔浦縣城隍神文

賽永福縣城隍神文

賽城隍神文

賽堯山廟文

賽舜廟文

賽越王神文

賽北源神文

賽曾山蘇山神文

賽白石神文

賽龍蟠山神文

賽陽朔縣名山文

賽海陽神文

賽古欖神文

賽侯山神文

賽建山神文

賽莫神文

賽石明府神文

祭蘭麻神文

爲濮陽公祭太常崔丞文

爲司徒濮陽公祭忠武都押衙張士隱文

爲賈常侍祭韋太尉文

爲西川幕府祭韋太尉文

代李元爲崔京兆祭蕭侍郎文

爲絳郡公祭宣武王尚書文

爲裴懿無私祭薛郎中袞文

爲李郎中祭舅竇端州文

爲李兵曹祭兄亳州刺史文

欽定全唐文卷七百八十一

李商隱 十一

爲舍人絳郡公鄭州禱雨文

年月日鄭州刺史李某謹請茅山道士馮角禱請於水府
真官伏以旱魃爲虐應龍不興困杲日於詩人苦密雲於
易象生物斯瘁民食攸艱某叨此分憂俯慙無政爰求真
侶虔禱陰靈滅咄表勤褰帷引咎伏乞下通榮播上達天
潢合爲膏澤之原用息蘊隆之患其於效信或敢逡巡暴
露託詞焦勞結慮泉間候氣樹杪占風惟望玉女之披衣

敢駭商羊之鼓舞竊希元感聽察丹誠

爲李懷州祭太行山神文

謹按禮經云諸侯得祭名山大川之在其地者今刺史乃古之諸侯太行實介我藩部險雖天設靈則神依豈可步武之間便容孽豎磅礴之內久貯妖氛今忠武全師河橋銳卒指賊庭而將掃望寇壘以爭先神其輔以陰兵資之勇氣使旌旗電耀桴鼓雷奔一麾開天井之關再舉復金微之地然後氣通作限雲出降祥長崇望日之標永作倚天之柱酒肴在列蔬菓惟時敢潔慮以獻誠冀通幽而寫

抱

爲安平公兗州祭城隍神文

年月日致祭於城隍之神四民攸居是分都邑五兵未息
爰假金湯惟神受命上元守職斯土擁長雲之壘提却月
之營主張威靈彈壓氛祲某方宣朝旨來總藩條帳中之
列旣安幕下之籌敢失神其守同石堡護等王關長令萃
若岸焉無使復於隍也

爲懷州李使君祭城隍神文

年月日致祭於城隍之神某謬蒙朝獎叨領藩條熊軾初

臨虎符適至敢資靈於水土冀同固於金湯况彼潞人實逆天理因承平之地以作巢窠毆康樂之民以爲蝨賊一至於此其能久乎惟神廣扇威靈劃開聲勢俾犯境者望飛鳥而自遁此滔天者聽唳鶴以虛聲崇墉載嚴巨塹無壅今來古往永無川竭之因萬歲千秋莫有土崩之勢神其聽之無易我言

爲中丞滎陽公祭全義縣伏波神文

年月日觀察處置使兼御史中丞鄭某謹遣全義縣令韋必復以酒牢之奠昭賽於漢伏波將軍新息侯馬公越城

舊疆漢將遺廟一派湘水萬重楚山比潁川袁氏之臺悲
同異日方汝水周公之渡感極當時嗚呼昔也投隙建功
因時立志隗將軍坐談西伯棄去無歸梁伯孫自降王姬
雖來不起以若畫之眉宇開聚米之山川扶風里中詎守
錢而爲虜德陽殿下寧相馬以推工悵望關西趨馳隴右
事嫂冠戴誠姪書成龍伯高之故人出言有所公孫述之
刺客相待何輕鳶泊啟行蠻溪請往銅留鑄柱革誓裹尸
男兒自立邊功壯士猶羞病死離湘之澣祠宇依然豈獨
文宣之陵不生刺草更若武侯之壠仍有深松向我來思

停車展敬一樽有奠五馬忘歸及申望歲之祈又辱有秋之澤雲興柱礎電繞牆藩何煩玉女之投壺方聞天笑不待樵人之取箭已見風迴敢忘黍稷之馨用報京坻之賜屬以時非行縣不獲躬詣靈壇詞託煙波意傳天壤既謝三時之降兼論千載之交勿負至誠以孤元契

爲中丞滎陽公桂州賽城隍神文

惟大中元年歲次丁卯六月甲午朔十四日丁未都防禦觀察處置等使桂州刺史兼御史中丞鄭某謹遣登仕郎守功曹參軍陸佚以庶羞之奠祭於城隍之神夫大邑聚

人通都設屏將英雄走集必假高深不惟倚仗風雲兼用
翕張神鬼某初蒙朝獎來佩藩符旣禦寇於西原亦觀風
於南國始維畫鷁將下伏熊屬楚雨蔽空湘雲塞望晦我
中軍之鼓溼子下瀨之師遂以誠祈果蒙神應速如激矢
勢等却河及茲報薦之期敢怠馨香之禮神其干霄作峻
習坎爲防合烽櫓以保民凜川塗而流惡使言言堅壘侔
地道以無疆活活深溝如井德之不改勿違孔禱以作神
羞尚饗

爲中丞滎陽公賽理定縣城隍神文

金定全唐文 卷一百八十一
都防禦觀察處置等使兼御史中丞鄭某謹差理定縣令
某具酒肴昭賽於縣城隍之神日者穴蟻不封商羊未舞
爰憂卽日將害有秋我告於神神能感我雲纔作葉雨已
垂絲旣開豐稔之祥敢怠馨香之報神其無羞小邑勿替
元功永作蔭於城郭溝池長想報於禾麻菽麥守臣奉職
孰敢不虔

爲中丞滎陽公祭桂州城隍神祝文

維大中元年歲次丁卯八月甲午朔二十七日庚申桂州
管内都防禦觀察處置等使正議大夫使持節桂州諸軍

事守桂州刺史兼御史中丞上柱國賜紫金魚袋鄭某謹
遣直官攝功曹參軍文林郎守陽朔縣令莊敬質謹以旨
酒庶羞之奠敬祭於城隍之神濬洫崇墉所以固吾圉春
祈秋報所以輔農功今露白雷收蟲坏水涸念時暘而時
雨將乃積而乃倉敢以吉辰式陳常典神其保茲正直歆
彼馨香聿念前修勿虧明鑒昔房豹變樂陵之井味任延
易九真之土風豈獨人謀抑由冥助今猶古也神實聽之

賽靈川縣城隍神文

年月日賽於靈川縣城隍之神高壘深溝用資固護興雲

渫雨諒俟威靈惟神能感至誠將成大稔逐清泠之耕父
不使揚光迴沮澤之蟠龍皆令灑潤式陳微報願鑒惟馨

賽荔浦縣城隍神文

年月日賽於荔浦縣城隍之神嗟我疲民每虞艱食寒耕
熱耨始望於秋成鑠石流金幾傷於歲事遠資靈顧式布
層陰無煩管輅之占不待欒巴之嘆竊陳薄奠用答豐年
神其據有高深主張生植同功田祖比義雨師無假怒於
潛龍勿縱威於虐魃守茲縣邑富我京城

賽永福縣城隍神文

年月日賽於永福縣城隍之神夫考室立家先立戶竈聚
人開邑首起城池固有明靈降而鑒治惟神克揚嘉靈廣
育黎民聊爲茨梁少申肴醢神其節宣四氣扶佑三時勿
使畢星但稱於好雨無令田祖獨擅於有神永馨蘋藻之
忱長挾金湯之勢

賽城隍神文

年月日賽於城隍之神惟神據雉堞以爲雄導溝池而作
潤果成飄注以救憐焚敢愆斯牲用報嘉種神其永通靈
感長懋元功導楚子之餘波霈晉國之膏雨苟能不昧報

亦隨之

賽堯山廟文

年月日賽於堯山之廟伏以帝巡遐徼天作高山旣比敬
於軒臺亦分功於農井是留遺廟以慰斯民昨者時雨忽
愆秋陽稍亢永言嘉霑實自元恩大驅蟠澤之龍盡發潛
泉之蛰倉箱興詠將慶於農夫灌漫呈功不愆於豎子敢
茲昭報冀降明靈

賽舜廟文

年月日昭賽虞舜之祠伏以帝狩南荒神留下土翠華莫

返積怨慕於他年大麓不迷烜成靈於終古比憂嘉種少
冒愆陽抗簡陳詞潔樽引咎果蒙憑離掣電跨異揚風布
霑渥於九皋起焦枯於一瞬敢陳瑤席輒事蘭羞帝其罷
奏南琴停吹西琯使東皇太乙兼預於靈遊俾山鬼江斐
無藏於沴氣庶將善政以奉明輝

賽越王神文

年月日賽於越王之神惟神輝焯殊姿抑揚奇表秦魚旣
爛則聊帝南荒漢鹿有歸則稱臣北闕覽英雄之載籍信
王霸之朋遊言念遺祠猶存屬邑尚興甘雨以救公田敢

卷之五
七
陳沼澗之毛用報京坻之積神其永司茲土長庇吾人福
佑柔良驅除疫癘今來古往常教威著越城萬歲千秋勿
使魂歸真定神乎不昧來鑒斯言

賽北源神文

年月日賽於北源之神惟神雖臨南服實號北源湘浦降
神近驚於騷客泥池浸稻遠協於詩人果能橐籥風頭索
綯雨腳不資畎澮將致倉箱聊申信於澗毛庶通靈於水
府神其抑揚蘭佩麾掉桂旗拍川后之肩攬波神之袂共
來於此饗報留思

賽曾山蘇山神文

年月日賽於曾山蘇山之神惟神守在出雲職惟通氣果
從望歲載潤嘉生將申昭報之儀敢闕馨香之獻神其遐
瞻惟岳廣納遊塵勉揚少女之風勤詠曾孫之稼無令渥
澤盡歸涇水之湫泉勿使威靈不及歷山之仙室我辭有
激神儻聽焉

賽白石神文

年月日賽於白石之神惟神載烜明靈克標懿號軒珠耀
彩儻非瑤水之源荆璞流輝卽是玉山之路昨者俯憂旱

歲俾禱遺祠果能愛我大田貺余膏澤不俟于公之雪獄
無煩洛令之曝身敢命子男爰修蘋藻神其仰濟天澤俯
佑歲功無萌可轉之心以負惟馨之禮尚饗

賽龍蟠山神文

年月日賽於龍蟠山之神惟神降治山川流恩縣道龍幡
鳳蓋克懋於靈司蟻穴鸛巢式揚於利澤至誠有達昭報
無虧神其叱咤飛廉鞭驅屏翳尚令吾土屢有豐年不無
行潦之羞以謝油雲之會

賽陽朔縣名山文

年月日賽於陽朔縣名山之神惟神受命上元奠茲南服
雲臺日觀遠讓於高標蓬島崑邱遐通於爽氣峻若藏刀
之嶺崇如倚劍之門是宜銓管陰司拘囚異物爲神仙之
下府開龍虎之殊庭屬歲不寧旱旣太甚馳誠疊嶂託意
通波果聞雷出地中電流巖下旣茲霑足敢薦香芬願終
如響之靈無怠孔明之鑒尚饗

賽海陽神文

年月日賽於海陽之神頃傷多稼將困驕陽未逢玉女之
披衣空見土龍之矯首式祈嘉霽果降明輝神其享彼蘭

羞挹茲桂酒輔成於多黍多稌助施於好風好雨庶厲業
官以酬元澤

賽古欖神文

年月日賽於古欖之神惟神爰因碩果遂啟靈祠瓜美邵
平且傳舊志李標朱仲亦茂前經昨者瘴暑爲災油雲不
起式存心禱慮作神羞神能感氣喚泉傳祥鸛垓使宋生
抒賦始悅於雄風高氏讀書忽驚於暴雨化太甚旱爲大
有年將見助於歡康敢忘懷於昭賽

賽侯山神文

惟神越嶠分雄魯岳學峻慰農夫之望歲揚少女之微風
變俾枯荻化爲嘉穀將期大稔敢薦馨神其貺我秋成
羨余民食無俾董生之說空閉陽門勿令夷水之風屢鞭
陰石苟歲旣登矣則神永歆焉

賽建山神文

夫神必依人山惟鎮地式融靈命必建元司前者憂切蘊
隆念深流鑠詎言膏澤忽致有秋敢備杯盤羸陳肴藪神
其留歡屏翳通意馮夷叶時雨於東臯卷陽雲於南裔我
民奉事無或不虔

賽莫神文

惟神克扇明靈居余屬邑能作殷臣之雨欲豐唐叔之禾
輒以良時爰陳薄奠神其俯臨上席少解靈衣舞朱鳳於
南方召元龍於北極永調和氣無易至誠

賽石明府神文

惟神化洽處琴享存樂社銅章墨綬應非百里之才嘯虎
吟龍猶續三時之雨余也謬當廉部未及行春飛鳧懷鄴
令之庭沸井想延陵之廟神其論交異代降福斯民常俾
旗雲庇我嘉穀聊茲薦報庶或感通

祭蘭麻神文

年月日祭於蘭麻之神頃者杲日揚威融風扇暑禾乃盡
偃人何以堪神能倏忽應時逡巡布潤雲旗直集不資秦
地之決渠雨陣斜飛更甚成都之救火永懷靈祐敢薦嘉
肴神其與蕙同芳爲蓬扶直勿虛嘉號以累豐年

爲濮陽公祭太常崔丞文

年月日惟靈泰岳繁祉安平望族潤地勢於長源構堂基
於修麓藍田之產宜有良玉徂徠之林宜無凡木昔我待
子松玉之間冀十城之得價望千尋而可攀大年不登逸

足方駛松欲秀而先蠹玉將攻而遽毀聞問之時歎悼何
已惟我承乏受命南征一言相許攜手同行覓絕萬里飄
泊雙旌念兩婢之價倍媿五穀之酬輕地接殊鄰風移中
土五嶺三江炎風瘴雨釣犀之潭跼鳶之渚席上從容幕
中宴語先防載苾之謗更示投香之所因使庸虛不罹罪
罟越井之酋甘綏之女時清則銅鑪納廚歲稔則銀簪叩
鼓豈我之自惟子是與相從來覲又往於涇風埃古戍霜
雪孤亭偏裒之服縵胡之纓塞迴而晨嚴刁斗沙平而夜
警兜零指吾以虜隙勉吾以武經正慰窮邊俄還京邑北

庭減價南轅雪泣章臺辟掾方喜趙嘉之來棘署選丞仍
見譙元之入是焉踐歷更俟飛翻況乎鳳沼又接鵠原何
覺成乎燥溼而厲結乎寒暄未及西山之藥旋爲東嶽之
魂憶昔舊許員歸青門出餞樂作而歎起杯行而淚泣但
容與於風波共沈吟於鐘箭揮袂如昨郵書甚頻雖遙道
里未濶聲塵孰謂念歸之日翻爲有慟之晨嗚呼哀哉髣
髴荒阡依稀古陌徐動丹旌永歸元宅願執紼而身遠想
移舟而莫及迴夜秋思羣山暮色恨白髮之衰翁哭青雲
之舊客聊茲寄莫莫寫西悲已乎崔子爲吾歆之

爲司徒濮陽公祭忠武都押衙張士隱文

惟爾業傳元女胄自青陽三河設辦五郡推良廉用苞含
立節柔將恭謹摧剛伊昔頑民實鄰舊許豺終覆族犬猶
戀主從諸侯之鈇鉞逐大將之旗鼓任重前馳眾纔一旅
許伯則摩壘而旋曹仁亦逢溝不渡舉無遺算仕匪遭時
何茲皓首不識丹墀劍折而空畱玉匣馬死而猶挂金羈
刮骨瘡深通中毒作昔夢膏肓之豎靡効君臣之藥休拔
趙幟空張衛幕塵凝而筆聚先投蟲蠹而書攢舊閣余方
守職爾欲埋魂想鬚視虎料臂看猿泉驚夜壑草變寒原

荒陌是永歸之里老松無重啟之門嗚呼聽挽心傷覩輦
目眩苟公忠之義著雖古今而情見冀幽壤之是聞饗臨
棺之一奠

爲賈常侍祭韋太尉文

至道之世君臣聖明必有才賢爲之挺生昭昭我公得一
居真窺神靈之壺奧涵天地之淳精曾襟洞達方畧縱橫
文房啟而風雅斯在武庫開而禍亂乃平甲子之歲逆泚
變節河海沸騰宗社杌隄孤軍隴上勢窮援絕激臨危之
肝肺成曠世之勲烈帝有寵命擁旄蜀川威聲烜赫德禮

昭宣家有美政人無冗賢熙熙穆穆二十餘年機謀內發
英明獨照頓挫西戎經營南詔通驃國之幽阻導彌臣之
寧窳咸屈膝於君王信萬古之榮耀方期驅兵率乘覲謁
帝庭承汪濊之殊澤陳訐謨之大經如何尊重遘茲殞靈
地偃喬岳天沈輔星昨者疫癘之日咸望再起頻造屏內
候公動止憂國慷慨請立太子事苟未行歿而後已今上
嗣位人神交喜哀傷大賢不見如此某謬以菲薄監臨此
軍參蕭曹之議論覩伊霍之功勲淒涼門館顧慕風雲非
百身之可贖寄一慟於斯文

爲西川幕府祭韋太尉文

維年月日祭於某官之靈聖歷應數今古同風五百年間
運屬我公長河噴射太華穹崇鬱起生人之表獨棲顥氣
之中往者鯨鯢蕩海波濤洶洶京洛風塵人神震恐公遂
屹立天授智勇斬刈師徒扶持汧隴逆黨顥顥心摧計擁
繇是安危繫之輕重天子報功禮數乃殊旣握龍節亦執
金吾國之西南實曰成都夷夏混合山川盤紆苟非哲人
莫起令圖咨我賢達付之方隅公乃厭坤維以厚德注羣
生以和氣應變參乎杳冥布政歸乎簡易剗風俗之姦窳

平人心之險詖肅貔虎以雲屯禮英髦而磨至蠲萬疴於
藥草新百貨於鄜肆綢繆賓客之歡肅穆鬼神之祀補前
人之漏畧極當時之能事道尊而獷俗承風聲烜而殊鄰
慕義狺狺犬戎背約報仇疆場蠱毒大邦寇讐公動機權
控扼咽喉闢其陬落係其魁酋峨和宰雲大度橫流伏不
敢動垂二十秋伊昔南蠻嚮化虔奉朝旨將率非良撫綏
失理興兵戰伐深入邊鄙十萬之師蕩爲癘鬼公以誠往
彼由感起拜新詔於皇都歸舊封於越巂提攜椎髻之類
遙列青衿之齒驃國之與彌臣伏聯蹤而疊軌臣製樂以

奉聖聖裁文以敘美考一德之輝光諒有德而已矣方期
五福之壽享九命之尊致雍熙於宇內相玉帛於天門何
至業之堙鬱逢逝水之迅奔竭涸滄海摧頽崑崙精靈一
去徽烈空存嗚呼哀哉錦城秋暮北郊長路寂寞山川蕭
疎草樹雖蘋藻之屢薦終轎車而不駐慟軍府之悲涼增
煙霞之思慕某等俱以孱鈍獲事旌旄庇蓮府之光彩無
汗馬之勲勞戴恩愧厚顧位慚高問沈痛之何有與二江
以滔滔

代李元爲崔京兆祭蕭侍郎文

年月日惟靈傳芳華
胄稟慶靈源漢朝輔相之流輝梁室
帝王之遺懿克生俊德彰我休期高表百尋澄波萬頃及
春闈獻藝會府試才騏驎出塵蛟龍得水頓纓而駑駘盡
喪乘風而鼈蜃皆空憑陵遠天躑躅長道是將筮仕光乎
縉紳侯國從知大朝就選秘寶宜陳於東序朱紱必降於
上元錦幔而居青纁以覆建禮推盡瘁之績明光多伏奏
之勤亦旣遷榮乃司論駁高居青瑣封還紫泥使明時無
失政之機大邦無不便之詔暫辭朝籍往分郡符借寇莫
從徵黃甚急方將啟乎良友進彼令人志豈愛身誓將許

國不謂疎網猶漏斯民未康作礪爲鹽正俟理平之運依
城憑社深懷翦滅之虞上蔽聰明內求媒近故鴻猷不得
而協贊睿化莫可以輔成藐是流離有窘陰雨嗚呼令惟
逐客誰復上書獄以黨人但求俱死銜冤遽往吞恨孤居
目斷而不見長安形畱而遠託異國屈平忠而獲罪賈誼
壽之不長纔易炎涼遂分今昔粵自東蜀言旋上京郭泰
墓邊空多會葬鄧攸身後不見遺孤信陰騭之莫知亦生
人之極痛某等頃同班列獲奉周旋分結死生地兼族類
依仁旣切慕德方深始驚南浦之悲俄軫下泉之訃今則

年良月吉筮協龜從顧埋玉之難追歎焚芝之何及牲牢
麤潔酒醴非多聊寫丹忱以伸永訣

爲絳郡公祭宣武王尚書文

伏惟曾構高基往修峻址俯爲明時載生奇士杜林舅族
本富文理楊惲外孫素多圖史朱檻有裕括羽成美逸足
輕從東之道巨背狹圖南之水匡生明習董氏精專魯壁
墜簡汲冢遺編坐忘流麥出記憶鉛淹中莫敵稷下誰先
朝有曲臺時推輿學明博士之高選資眾儒之先覺殷周
損益夔夷禮樂旣得根源盡除躋駁粉闥假道諫署揚輝

吾寧訐訕時好依違周舉上章惟求主悟賈生草疏豈畏
人非用之則至捨之則歸旋領藩符俄司國計鋤革煩冗
修明課第鄙晉室之鬻練小漢朝之造幣前籌未借斂筭
還家再北非罪三黜何嗟淮陽勁兵潁水豪族旣佩新印
仍推舊轂杜當陽何嘗跨馬雄士爭推祭征虜不廢投壺
師人自睦夷門地古梁苑藩雄雙旌大旆二矛重弓無忌
御車惟求隱者相如謝病乃慕高風方將副帝注心從時
大願率周廟之奔走總漢庭之議論人之不幸今也則亡
莊子孰分其魍魎秦醫莫救其膏肓雁沼波瀾空聞悲咽

兔園臺榭祇見荒涼某獲顧尤深蒙知甚早公昔分茅愚
嘗視草於劉向論思之時贊孟舒長者之號及茲出守實
介親鄰音徽繼好寤寐依仁常期異日克奉清塵何言永
慟屬此嘉辰訃哀如昨歸轍攸遵林薄莽蒼川原隱轡想
諸葛之旗鼓空還舊壘念伯喈之書籍已付何人候館攸
開丹幡遽至瞻望衛幕連縣秦時寄奠申訣緘詞寫意終
阻願於躬親徒加哀於殄瘁嗚呼哀哉尚饗

爲裴懿無私祭薛郎中袞文

伏惟靈佐商宣業朝薛傳規門崢層構堂嶸崇基玉生藍

岫芝產銅池梧高佇鳳蓮馥停龜有美令人再稱清劭訓
在詩書樂惟名教王謝標格曹劉才調清如濯熱之風明
若觀朝之燎靈臺委鑒虛室融和秋水望濶春臺上多鄉
塾掉鞅文林厲戈硯橫河漢紙落煙波澤宮狸首棘場楊
葉箭去星慙弓懸月怯兩書上第五辟名公馬卿賦雪陳
琳愈風平臺竹苑淮山桂叢營分細柳幕染芙蓉顯備臺
僚榮從憲秩冠峨鐵勁衣明繡密霜下簡端風生落筆庭
夜烏迴天秋隼疾帝念充職任於諫垣依違絕想從容敢
言攀檻而空畱跡在削藁而不見書存女史護衣大官供

食伏奏多可分曹著績帳煖錦麗闡明粉白旣題柱以如
田亦償金而類直漢榮出牧晉議州兵廉袴歌送劉錢贈
行濟南之誅巨猾揚州之試諸生虎去江靜珠來岸明神
豈好謙天寧秩禮蠹華國之明品喪士林之模楷使爲善
者奪氣求仁者解體已不駐乎卿雲竟何窺於伏濟長洲
樹古茂苑山春橘稅旣集茶征是親鵠度雪而去遠鵲下
亭而唳頻翟虜氛興殷楹夢起帳入飛鵬牀驚鬬蟻鄭元
知數阮瞻無鬼終自膏肓傳於骨髓嗚呼哀哉丹霄萬里
建木千尋坦坦清路瞳瞳翠陰三襲臺迴九重禁深中懸

旒宸下集華簪無非東箭盡是南金或扶傾作棟或望旱
爲霖顯允明公宜膺百福夜暗神昧天長景促青女變霜
羲和納旭悄隨掌以銷璣慨周閑之喪駿永惟清族本富
才人有弟則陸無兄不苟原鵠奕奕沼雁馴馴珩奇動楚
璧貴傾秦永矣彼蒼胡然人事但續椿壽徒高鶴位摧壓
光價掩淪聲味潁不濁而殄灌宗淮未絕而傾王氏某因
承中外獲奉恩知通孔李道德之舊兼盧劉姻戚之私鑄
顏有契全趙爲期靜龍門之風水剗羊腸之嶮巖空欲銘
恩何酬樹德庇孤根於高援許嘉姻於弱植將歡宗子俄

放湘南綬黃楚微鬚白昭潭歸止未卜棄子是甘許靖之
悲方極王粲之憂不堪猶辱重言將敦故約玉無改行金
不如諾曷大義於幽沈軫遐心於漂泊使者尚在凶書已
來雁足空遠魚腸不回淚和峽雨哭振巴雷孰澆枯鮒誰
熱寒灰今則言去彬江當移澧浦稍脫疑網猶罹罪罟念
申慟以無期豈沈冤之可吐嗚呼哀哉執紼路阻佳城望
賒凌空乏翼上漢無槎或期他日式返中華認楊公之石
鳥撫周苞之辟邪况良治規存遺經業在臧孫有後魏萬
必大敢期陋質終託餘光韋平之紹續無望秦晉之婚姻

豈忘絮酒無幾生芻是將辭多失次淚數無行冀桂旌之
不遠降蘭佩之餘芳嗚呼哀哉尚饗

爲李郎中祭舅竇端州文

始虞命夏暴於元穹功垂刊木德協堙洪洎帝相之難作
誕少康於竇中由屯獲吉因生受封降及後代傳勲繼庸
西京則嬰爲外戚東漢則融居上公愍陽城之不享始移
籍於扶風源遠更清基高自峻有焯明靈靄然休問陋巷
不憂坦途方進月遠標儀霞高映論玉寧韞匱雖安處囊
宜伸尚屈將集猶翔潛師大易謙尊以光誓安老氏債少

易償爰紆銅墨是宰濠梁宓琴時奏潘樹逾芳入贊朝儀
言揚事舉圭璧蠻夷弁冕文武吐辭含韻知今博古進抑
退揚從規合矩復陶啟位殿省承榮孔門之束帶無忝叔
孫之縣蒞難更君子信讒小人道長未暇閉關難期稅鞅
暫持竹符遠出羅網誰識卑飛因成利往銅梁改秩錦里
經時人去而琴臺壞棟文移而石室摧基劉宏之重銘葛
廟王商之更立嚴祠隴首云歸端溪遽逐角豈觸藩臂終
困木海濶天盡山深霧毒許靖他鄉有名無祿馬超正色
宜歌反哭何爲善之無憑而降災之甚速某欽惟教義夙

所依因在昔家世勤王實殷高旌大旆結駟飛輪慶豈遺
於白出榮實萃於外姻一紀以來艱凶遘及嗟宅相以無
取懼堂構之不集詎言渭水之乖離竟絕西川之出入嗚
呼哀哉違京背闕古陌荒阡松門積靄隴首停煙祖庭是
日乞墅何年淚有昔而皆裂憤無膺而可填况玕剖郡符
環持使節塞遠城迴河窮路絕顧後瞻前形孤影子長號
出次重拜臨穴酒醴清濃肴羞羅列庶有鑒於斯文莫不
同於虛設嗚呼尚饗

爲李兵曹祭兄亳州刺史文

伏惟靈天枝挺秀帝系傳芳材高杞梓價重珪璋蘭芷斯
茂先以馨香干鎮將用不剄鋒鉉始備千牛俄仕諸衛逸
意方起絕足猶繫爰佐羣僕亦掾神京邑惟二宅曹實五
兵地峻流急官閒政清嵩少曉霽伊洛秋明侶能吟之謝
客伴作賦之賈生遂擢堯廚曾調湯膳位列大朝名參內
殿朱紱輝華銀龜蒨粲漢有宗正委之親賢貳彼惟月人
寧我先外夷求聘天子憂邊皇華始賦紫綬俄懸雄其出
塞之任假以中臺之權不拜無慙於蘇武去節寧類於王
焉銜鬚誓死齧雪獲全帝仗使者吾無愧旃旣返中華止

同屬國蒼蠅難祛貝錦方織好丹非素點白爲黑遭時不
知非予有感旣失志於絳灌遂不容於樂卻竟陵山水鍾
離控扼名貴隼旟時瞻熊軾人以功遷吾由謗得其明若
神其惠如春先除黠吏且活疲民汙萊盡闢邑室重新草
梓木瑞獸去烏馴方候徵還俄嬰美疾積微而桓侯竟晚
達命而徐公待盡怳怳空驚遲遲未信誰知泉路之高低
孰測夜臺之遠近永惟良配亦實女師庶姜尤效君子是
宜異室無怨同穴有期河魴著詠皎日裁詩嗚呼哀哉龜
筮協從日時斯卜將去荒郊言辭華屋草樹縈帶川原迴

復白髮孤弟臨棺慟哭失慈撫於終身宛聲容之在目心
摧則冰炭交集血下而縋縻相續萬古永訣百身何贖酒
滿未御肴乾未臨已矣伯氏來慰哀心

欽定全唐文卷七百八十二目錄

李商隱

十二

代諸郎中祭太尉王相國文

韓城門文請爲子姪祭外姑公主文

爲馮從事妻李氏祭從父文

爲王從事妻万俟氏祭先舅司徒文

爲王秀才妻蘇氏祭先舅司徒文

爲外姑隴西郡君祭張氏女文

眞相國令狐公文

祭呂商州文

祭長安楊郎中文

祭張書記文

祭外舅贈司徒公文

重祭外舅司徒公文

祭處士十二房叔父文

祭韓氏老姑文

祭徐姊夫文

祭徐氏姊文

祭裴氏姊文

祭小姪女寄寄文

欽定全唐文卷七百八十二

李商隱 十二

代諸郎中祭太尉王相國文

維太和四年月日某官等敬祭於故相國贈太尉太原王公之靈嗚呼天以和氣鍾於貴人含光不曜煦物如春發自貢士驟爲庭臣鴻雁聯行共凌青雲旣操利權兼秉國鈞食祿甚厚奉身如貧井絡之隅益部爲大斗牛之下揚州繁會受社臨戎油幢曲蓋印綬重疊恩華霽霈簿領如山處之若閒權筦之權往而復還炎炎暉暉出入二紀未

會傷物屢有薦士急難友弟謹厚訓子顏間熙熙不形慍
喜處已無咎得君如此若木方高香飄歟起三台之氣變
見在時五福之來盛衰有期晚下黃閣車騎威遲夕歸華
堂言笑嘻怡詰朝慙然有恙求醫未撤琴瑟俄懸素旗宸
衷震悼朝右悽悲詔下褒崇恩殊等夷靈輜旣駕真宅將
歸笳簫咽而復揚風日慘而無輝元亮等或蚤挹清塵或
晚承泛愛昔修禮於門楣今纏悲乎祖載幽顯雖異音徽
未昧神之格思歆此誠醑尚饗

韓城門文請爲子姪祭外姑公主文

伏惟靈圖蓋垂慶方與薦祉彩炯金沙芳流瑤水振馥掩
蕙懷穠耀李前朝則稟謝成篇東漢則儀班問史後宮承
露別殿相風屏高雪透簾虛霧蒙武帝之黃金屋裏阿母
之碧綺疏中方星婺對比月娥同魯館未築堯親尚宴吹
管邀雲投壺笑電憑淑倚柔含芳吐菡樓欲起而鳳來橋
將橫而鵲遍唐推姜姓周重崔門王子敬以筆劄取何平
叔以姿貌論女媧前師嬪慙後則比神仙而作配豈工容
而校德揚歷中外便蕃寵榮旁規不替內助無傾釗分沈
躍桐半死生機殘緯斷瑟怨絃驚唐邑荒臺沁園古木往

往遺翰依依爇燭皋平風緊川斜日速雖有祭以呈文終
無城而驗哭怨能感物憂可傷人膏肓語夜瘡首藏春五
聲誰驗九折非神空畱遺範竟掩光塵嗚呼哀哉某自辱
嘉姻亟移年序試種玉而有感實坦床之無譽因依高義
俛仰清規假華闕一字之繩墨保私門之鼎彝恩重事著德
流慶垂旣歡琴瑟亦賦螽斯今則窀穸有期聲容漸隔表
署古道啟揚曲陌九醞斯在八珍如昔縱有寫於千辭終
難期於再覲嗚呼哀哉敢緣愛女冀望遺靈固將不昧儻
或來聽

爲馮從事妻李氏祭從父文

有美吾門實繫公族絳霄結蔭皇極流輝自嚴君以交辟
延榮仲父以立朝衍慶叔父雖禮疎五服而義協一家馬
援於兒姪之間一情無異王華在兄弟之列數從猶親吉
人寡辭君子無爭屬者以獻賦不遇投筆從戎鏡水稽山
聊屈觀書之望甬東淞右始開傳劍之名經途幾千去國
數載爰因職貢來奉闕庭傳車方馳朝露溘至禍生朽索
釁起揚鞭始驚香而不禁俄折臂而無望嗚呼存亡恒理
修天常期所悲者方次中塗所痛者非因美疢稅鞅告痛

肩輿數晨旣鍼艾之莫徵果舍襪而斯及况乎合室遠在海涯一女方羈二子未卅人生甚痛天道奚言今以家國載遙十戈未息尚稽歸祔乃議從權定鼎城東永通門外南瞻嵩嶺北望邙山式崇寓殯之封且作藏神之室必也慶延異日時屬通年先溫序之思歸俟臧孫之有後二十一姪女早蒙慈撫久歎違離今又從夫山東食貧洛水將療無及驚悲有加敢因祭醑之馨聊冀精靈之降嗚呼叔父永鑒卑誠

爲王從事妻万俟氏祭先舅司徒文

新婦疊咎所招重罹天譴始釋縲而就吉俄解悅以聞凶
衰禍所延或深諸婦冤號之地良異他人爰在高堂嘗依
諸舅聿來我族實號儒門雖傳業於詩書冀同光於軒冕
羽書銅印東泛西浮及世難旋臻家徒壁立望萍蓬而結
歎指溝壑以貽憂竟蒙念切諸生言憂幼女卜云其吉天
也來儀蓮幕高華蘭階秀異尊卑共感里巷同歡豈謂百
兩纔歸雙旌遽改雖在途稱婦已蒙羔雁之榮而辭家適
人未具箴輦之敬詎言不日奄背深慈永痛長號五情分
裂嗚呼哀哉遠國千里夜泉九重側聞龜筮之言將備塗

芻之禮今以干戈未息途路多虞清貧昭難食之憂遐阻
難舉家而往不獲躬隨絳旒親詣松扃撫行引以傷摧抱
眇孤而惋毒酒醪粗列蔬果空陳身叩盃盤血沾匙筯榮
同子婦雖稱美於他宗念繫孫甥亦兼情於血屬敢希神
理賜監哀衷

爲王秀才妻蘇氏祭先舅司徒文

奉違慈顏將涉半載追攀莫及號毒無任恭惟尊靈好是
懿德其修身克己之規矩誓心奉國之忠誠武畧文經官
方政術旣外言不入於中壺故殊勲無預於斯文今瀝血

寫誠叩心寄酷祇欲以閨庭見聞之事申泉扃永遠之哀

三奠未終五情先潰嗚呼不祐天實爲之昔我門外首啟

侯服傳鼎銘於百代稱玉潤於十家新婦之先實繼儒德

羔鴈克光於宋子丹青遠比於瀛州

秦府學士之後

三紀以前六

姻推最俄已吉凶相反中外貽悲叢爾羈孤邈無依怙孱

形弱質言歸自出之私五嶺三江遠食分憂之祿結愛異

諸生之列延慈於眾妹之中雖手足乖離鄉關綿邈而蘇

氏魂靈有寄門構無虧言念慈仁實動肌骨新婦禱昧成

性誨誘難移大家以恤孤嚴室而悔過面授刀尺躬傳織

經常憂許嫁之時未盡宜家之美俄乃守龜有兆贄鴈來
儀克以眇軀榮陪諸婦愛忘於醜姻不失新良人既託於
外兄邱嫂復榮於猶女蕃縵百口咸蒙衣食之仁昆弟三
人並受簪纓之賜况茲屢歲時邁沉疴煎餌延憂禱祠積
費田巫密召秦緩旁求迴幽魂於再三割廉俸之千萬重
以某郎祇蒙嚴訓投迹名場載深惟疾之憂常有于飛之
命辭離蓋數就奉多違或榮寵屢加每乖於獻賀或起居
有恙蓋闕於煎調日月其除螽斯寡裕使二男繼天重貽
門戶之憂雖一女出家未有莊嚴之力方將湔腸洗胃易

慮兢魂冀收慶於將來用承光於厥後豈謂豐深無禱祐
薄難修方於百戰之中忽降兩楹之夢追摧酷裂五內崩
傷嗚呼士誰不榮者風義人誰不貴者勲庸八綰州符兩
司廉印三遷省座四陟齋壇玉帛賢豪畧盈於管第袴襦
疲病橫勵於藩維雖清閒之事業無虧而大國之依憑未
極殷輪莫返撫節歸全上軫九重旁淒五服銀章拾級遽
爲告弔之恩水土分官飜作追榮之美天乎不憺神也何
依今則龜筮有從日月叶吉指祁連而啟引復京兆以開
阡絳旄前指桐棺後出嚴姑永慟以觸地令嗣長號而怨

天變霜景於春朝灑夜泉於晝景況奉御諸子服紀纔終
三川伯郎喪制未畢哭泣遂延於數院縗麻畧滿於一門
何昔時榮樂之多而今日奪傷之併短長有數冥冥難分
新婦誠合徒步叫哀臨穴申禮屬稚姑季叔或有止畱家
老與臣尚多依庇旣無冢婦難曠門庭嗚呼哀哉憤莫切
於冤痛永遠尊蔭者痛之極不登遐壽者冤之深痛極冤
深碎心殞首百身非贖九死何追蔬果盈前酒漿在列總
帷儼撤哀挽成行昔爲供養之資今作幽明之訣冤號圯
裂觸目崩摧伏希明靈一賜臨降

爲外姑隴西郡君祭張氏女文

吾配汝先世二十餘年七女五男撫之如一往在南海令
子云亡藐爾兩孤未勝多難提挈而至踰涇涉河十年之
間母子俱盡念汝差長慰吾最深女德婦容光映姻表秭
歸爲牧官閒俸優實獲我心因選良對笄梳纚纚環珮鏘
鏘螽斯鳳皇兩有深慶汝夫文章播於朋友身否命屯久
而不第郎寧合浦萬里乖離汝寄京師食貧終歲頃吾南
返又往朝那汝實從夫適來岐下道途雖邇面集猶妨金
馬碧雞長懸魂夢及登農揆去赴天朝汝罷蒲津聿來胥

會朝堂夜閣曲榻溫爐稚子雛孫滿吾懷抱汝時不佑忽
爾孀殘撫視冤傷載慟心骨旋移許下念汝支離卜室築
居言遷潁上路童作孽使節啟行崎嶇關山暴露戎旅汝
失所怙吾猶未亡念汝弟昆莫任堂構牽哀挽痛媮此殘
生日往月來旋更歲序吾衰汝少吾病汝強誰謂一朝汝
先吾逝五男未冠二女未笄哀憤之深難全禮道章兒盧
七取以依吾汝夫先邱遠在江渚羣從之內官名且稀劉
四頃年固難返葬始議權厝遂得嘉占白馬呈祥眠牛薦
吉里名三趙地邇九城風水無虞巒岡信美葬於所始古

爲達生將命來雲自我爲祖今汝之柩斯焉是歸嗚呼言
自淮陽已臨洛宅素棺丹旒託宿城隅盤具杯醪儼然已
備吾將臨汝用雪沈冤介婦諸孫憂吾衰齒俯令推測云
有相妨俗忌巫言吾非甚信牽衣擁路固不可違女使僕
奴寄辭而往肝腸兼潰血淚無行嗚呼曩昔容華生平淑
婉漠然不見永矣何歸將籍掛諸天遙歸真路將福興淨
域須赴上生將爲釁累所招遂淪幽界將是療治不至枉
喪韶年千感裝懷萬疑疊慮觸途氣結舉目心摧天實爲
之復將何訴嗚呼汝弟言護靈輜自始及今必誠必信棺

衾華好封隧幽深永從汝夫以安元路冤摧債結殆不勝
書嗚呼有靈領吾此意

眞相國令狐公文

戊午歲丁未朔乙亥晦弟子玉谿李商隱叩頭哭眞故相
國贈司空彭陽公嗚呼昔夢飛塵從公車輪今夢山阿送
公哀歌古有從死今無柰何天平之年大刀長戟將軍樽
旁一人衣白十年忽然蜩宣甲化人譽公憐人譖公罵公
高如天愚卑如地脫蟪如蛇如氣之易愚調京下公病梁
山絕崖飛梁山行一千草奏天子鐫辭墓門臨絕丁寧託

爾而存公此去耶禁不時歸鳳棲原上新舊袞衣

公先人亦贈司

空

有泉者路有夜者臺昔之去者宜其在哉聖有夫子廉
有伯夷浮魂沈魄公其與之故山巍巍玉谿在中送公而
歸一世蒿蓬嗚呼哀哉

祭呂商州文

惟靈族光鈞渭慶顯歌齊竹分東箭玉奪南珪委蛇霄路
睥睨雲梯淺牙洞鼠短刃分犀古聖堂與前賢町畦滌腸
效藥刮膜畱篋彈琴而放臣見釋買賦而妬后還閨旣步
京國亦薦鄉里與田蘇游有太叔美鄴都才運洛陽年齒

何晏神仙張良女子禮聞之擅譽也如彼冊府之傳名兮
若此囊成內殿之帷書貴皇都之紙中臺南省諫署戎藩
才難價重政舉人存蓮池易曉蘭圃多暄涵波獨躍弄影
孤翻王粲樓中常經暇日揚雄宅裏幾弔遺魂參差覲閔
萋菲成冤漢庭毀誼楚國讒原建禮門內明光殿外直金
旆肆於猜疑魏被竟從於沙汰蒙犯霜露支離埃壒厲山
遙鬱於朝嵐澁水傍奔其素瀨猶懷毒草過農井以低窺
尚憶神珠向隨臺而獨酌渚宮貳尹相府中郎將申夔屈
欲復駕行朱轡意氣早蓋輝光訓說則馬季長之居南郡

風流則殷仲文之守東陽劉寵一錢鄧攸五鼓遂解郡符
來登書府儒林文囿瑤山瓊圃鉛槧朝閱芸籤夜數瓜當
鄭灼之心錐在蘇秦之股是從佐理於彼東周雷喧洛派
電掣嵩邱玉泉嘉月金谷清秋陳思王之羅襪郭有道之
仙舟不無賦詠聊以優游漢入曉關晉分陰地藉賢太府
之政有古諸侯之貴載揚筆陣復清劍氣長卿消渴士安
風痺逝川幾歎於不迴朝露俄聞於溘至嗚呼昔也風塵
投分平生少年雕龍競巧倚馬爭妍開襟隨岸促膝伊川
月中乃共誇科桂池裏亦相矜幕蓮劉樗屢擲畢甕多眠

中以世務紛綸物情推斥撫事傷年減歡加戚路泣楊朱
絲悲墨翟縱風至而音來竟月同而地隔逮予廉部及子
頒條華樽旨酒綺席嘉肴各懸章綬俱失簞瓢誰論金而
契在終照玉而顏凋子牟之思魏闕望之之憶漢朝誠知
舌在不覺魂消書斷三湘哀聞五嶺天涯地末高秋落景
重疊憂端縱橫淚綆漏蚪夜促隙駒朝騁怨藻續之無睢
惜陽春之亂郢言念令季託余屬城鵠原雁序昔日懽情
蠻圻瘴嶠今日哭聲愍支體遽亡於手足况弟兄不如其
友生嗚呼厚夜依臺窮泉訪路已已金骨嗟嗟玉樹莫和

哀挽空陳薄具銜萬里之遐誠託千辭之寄喻異時松楸
枯朽羊虎傾頽草宿苔厚門平闕摧尚期越禮用寫餘哀
靈今不昧儻或來哉

祭長安楊郎中文

年月日謹以云云之奠祭於宗尹郎中之靈昔莊南華之
言物故則曰若巨室之偃歸人陶貞白之語元機則曰雖
頑仙不如才鬼邈矣高論嶙然深旨有感斯文屬在之子
黃河九曲泰華三峯潼亭之右陰晉之東泱泭佳氣盼蠻
孤風生民之秀惟子之宗旣懼四知亦畏三惑昔佐赤符

實毗皇極坦蕩王道昭宣帝則丹青不朽琬玉是刻狀日
昇東侔辰在北子之伯仲不忝前人粉飾賢路抑揚薦紳
雲間日下國華席珍排龍掩陸突鶴摧荀卓爾風標朗然
流品妍若春輝烈如冬凜燕石知媿齊竽自審咸指路以
光銷盡登門而聲寢難售者價重難知者聲清披沙揀金
由是不媿鳥散花落於今有情劉儒十行孫宏三道直路
猶弦蠹政如埽筆海驚波詞園鞠草文塲不寫於中心冊
苑空畱於秘寶晉千里國漢第一功建幢油碧啟幕蓮紅
賓高主擇韻合人同固不能加減陳掾亦可以喜怒桓公

衣繡含香省蘭臺柏赤管朝操青繅夜襞佐計相則生聚
有經贊地官而孤終協籍于惟荔浦言念金昆毀冠裂帶
雪泣星奔宅裏之荆枝半謝嶺頭之梅萼空繁陟岡望兄
詞客之情何極歸縣見姊騷人之恨猶存乃擢戎曹遂荒
京令將換清切以扶明聖不知者壽難言者命未謁季良
之醫已革曾參之病嗚呼平生世路纏綿交期孫金盧米
百賦千詩桂林崑嶠一片一枝終以浮沈因兼險夷對臯
壤之搖落成老大之傷悲尚冀他年或陶良夜酒筵琴席
燈聞月榭俱開怨別之襟並息分岐之駕短景未果良辰

不借竟鬱結於深衷
倏淹淪於大化
況南康解榻早降清
光會稽繼組昨辱餘
芳情分逾極
銜哀更長三十年之間
難追往事五千里之外
正恨殊鄉地濶山深
川寒樹古
杳杳元夜荒荒宿莽
生金認石埋玉恨土
寄奠緘辭呼風泣
雨噫嘻噫嘻宗尹之
魂來否

祭張書記文

維會昌元年歲次辛酉四月辛丑朔二十日庚申隴西公
榮陽鄧某隴西李某安定張某昌黎韓某樊南李某謹以
清酌之奠敬祭於故朔方書記張五審禮之靈嗚呼古有

不重千金殊輕尺璧或號百夫之防或作萬人之敵雖爭
雄角秀殊途異跡念閱水於千齡若衝飈之一息吁嗟審
禮寧或免之瞭眸巨鼻方口疎髭始自渚宮來遊帝里論
激懸河文酬散綺體物稱最登高擅美良時不來躁進爲
恥門巷蓬蒿荒涼如此藩溷筆硯寂寥而已梁多文士漢
有賢王猶市駿骨肯驚夜光長裾旣曳健筆誰當職高蓮
幕官帶芸香青袍如草白簡如霜東閣朝暖西園夜涼震
豈殺公謚惟故吏渭濱迴流馬之運峴首奉辭曹之諱松
筠不改琴樽有寄三徑方營一畝之地文多爲富無事當

貴亦解客嘲還答賓戲迴翔逸軌傲睨重霄將期晚節更
峻清標懸蛇結覺鬪蟻成妖迴生乏祖洲之草續斷無弱
水之膠陳尸重來而何望楚魂一散而難招嗚呼神道甚
微天理難究桂蠹蘭敗龜年鶴壽在長短而且然於妍醜
而何有某等早承餘眷晚獲聯姻或感極外家延自出之
念或恩深猶子多引進之仁或敬屬丈人之行或情兼內
妹之親有美吾姨靈慶攸屬尊公則師長庶僚夫人則儀
刑六族門高再世之侯家享萬鍾之祿經過款狎出入遊
陪映人玉潤覆水蓮開春歸別墅月滿高臺稽山傾倒謝

雪徘徊惜景而持繩欲繫邀歡而秉燭相催中歎乖離今
多至止仲叔辭辟而方返梅福罷官而未幾一則歸從回
鴈之峯一則至自跼鵲之水方將爲笛裁竹緣箏斬梓驅
羿射鴻招任釣鯉豁契濶於屯夷極平生之宴喜良覲雖
屢深懷未從三靈莫效一夢俄終露先寒而隕葉漏未盡
而聞鐘今則列樹開封揲著得吉絳旄前引桐棺後出隱
嶺原野淒涼雲日將歸宿莽之庭欲閉青松之室殷勤舊
偶冀望諸孤未歸下國且寓皇都江遠惟哭天高但呼必
有餘慶非無後圖嗚呼哀哉壺有芳醪俎多肥羜叫噪不

聞精靈何處鬱憤徒極含辭莫敘冀有鑒於酸嘶庶無乖於酣飫

祭外舅贈司徒公文

維某年月日子壻李商隱謹遣家僮賁疎薄之奠昭祭於故河陽節度使贈司徒之靈惟昔積德卜年源長慶延岐山之走馬胥宇嵩邱之控鶴尋仙重疊規矩蕃昌億千邂逅中代支離數賢豆藿失君隨庾謝而南度桃葉興詠弃江徐而北旋已失晉陽之菜地因開濮水之松阡時非得已吾寧固然王殷別祁縣之居未傷於教王濬占宏農之

寧紀律秋膠方折塞月未虧寇屯日逐師分谷蠡薛公之
揣敵情不過三策充國之爲兵學遠及四夷千牛不燧六
羸已馳沁園歸主細柳屯師赤狄違恩晉城告變假三齊
之餘醜犯神州之近甸懷邑營匝河橋旆轉城東陽而萊
子懼事在晏桓壁武牢而鄭伯憂功存孟獻示羸策密誘
敵謀深子陽之降奴失計袁熙之別將先擒元子能官季
男善賦咸移俎豆之業共集干戈之務金僕陷堅以深入
勁弩飛空而亂注誓與族以忘生報時君之善遇陳球家
室終避難以無聞去病子孫亦成功而有素大勲垂立定

命難言長城遽壞秦岳俄騫星墜營中先時盡見兒啼地
下此兆難原遂稽誅於賊壘遽貽慟於天關綏服無禮哀
劒加恩誠蘊蓄之非盡在始終而可論嗚呼哀哉惟公之
膺秀瓊筠稟和鍾呂青海萬里丹霄一舉季布金諾延陵
劒許旣辨冠於燕齊亦信開於梁楚揚親業就繼代名高
永言氣類莫匪英髦謝萬有安石之兄見推時俊王宏以
曇首爲弟遠映人曹故得行有二矛居懸重綬赤羽若日
金印如斗賜衣千襲罷加寒暑之初宸翰萬重誓在河山
之後重以夷門下士楚館求才御車表敬比鮪除猜同羊

俾之接賓共其醒醉異蔡凝之待士畧彼蒿萊而又理達
團空道通無著水月觀定春臺寄樂赤髭疏主擲麈尾以
無言綠髮仙翁攝霓裘而自却嗚呼哀哉其世榮也如彼
其全材也若此忽東輝之云宴雖西山而莫起語先陰之
代謝石火風燈追平昔之音容驚波逝水今則青鳥薦卜
白馬臨塋并移黃石始啟滕城元甲等嫖姚之禮荒阡改
京兆之名魏冢竹書幾年復出燕邱華表終古含情某早
辱徽音夙當採異晉霸可託齊大寧畏持匡衡乙科之選
雜梁竦徒勞之地雖餉田以甚恭念販舂而增媿京西昔

日輦下當時中堂評賦後榭言詩品流曲借富貴虛期誠
非國寶之傾險終無衛玠之風姿公在東藩愚當再調黃
帛資費銜書見召水檻幾醉風亭一笑日機中是月移胸
朧改頓水之辭違成洛陽之赴弔嗚呼哀哉漢陵搖落秦
苑冰霜將觀祖載遂迫瘡瘍謝長上聲度之虛羸升車未可
沈休文之瘦瘠執轡猶妨林薄終焉關河永矣抱痛酸骨
銜悲沒齒潘楊之好琴瑟之美庶有奉於明哲既無虧於
仁旨僧虔筆拙葛洪紙空裁詞有盡投血無窮希降光於
寓冀聊照恨於微衷

重祭外舅司徒公文

嗚呼哀哉人之生也變而往耶人之逝也變而來耶冥冥之間杳惚之內虛變而有氣氣變而有形形變而有生今將還生於形歸形於氣漠然其不識浩然其無端則雖有憂喜悲歡而亦勿能措於其間矣苟或以變而之有變而之無若朝昏之相交若春夏之相易則四時見代尚動於情豈百生莫追遂可無恨倘或去此亦孰貴於最靈哉嗚呼公之世胄勲華職官揚歷並已托於寄真備在前文今所以重具酒牢載形翰墨蓋意有所未盡痛有所難忘以

公之平生恩知曩昔顧盼屬續之夕不得聞啟手之言祖
庭之時不得在執紼之列終哀且痛其可道耶嗚呼七十
之年人誰不及三公之位人誰不登何數月之間不及從
心之歲聞天有慟方登論道之司時泰命屯才長運否爲
善何益彼蒼難知昔澤怪旣明告敖釋桓公之病陰德未
報夏侯知丙吉不亡何昔有其傳今無其證豈人言之不
當將天道之或欺雖北海懸定薨期長沙前覺災至偃如
巨室去若歸人處順不愛得正之喜在公之德斯盛在物
之痛何言矧乎再軫慮居屢垂理命簡子將戰之誓惟止

桐棺晏嬰送死之文寧思石槨素車樸馬疎巾弊帷成一代之清規揚百年之休問所謂有始有卒高明令終嗚呼往在涇川始受殊遇綢繆之迹豈無他人樽空花朝燈盡夜室忘名器於貴賤去形迹於尊卑語皇王致理之文考聖哲行藏之旨每有論次必蒙褒稱及移秩農卿分憂舊許羈牽少暇陪奉多違跡疏意通期賒道密紵衣縞帶雅貺或比於僑吳荆釵布裙高義每符於梁孟今則已矣安可贖乎嗚呼哀哉千里歸塗東門故第數尺素帛一爐香煙耿賓從之云歸儼盤筵而不御小君多恙諸孤善喪登

堂輒啼下馬先哭含懷舊極撫事新傷植玉求歸已輕於
舊日泣珠報惠寧盡於茲辰况邢氏吾姨蕭門仲妹愛深
猶女恩切仁兄撫發緯以增摧闔孀閨而永慟草莽土梗
旁助酸辛高鳥深魚遙添怨咽嗚呼精神何往形氣安歸
苟才能有所未伸勲庸有所未極則其強氣宜有異聞玉
骨化於鍾山楸柏實於襄氏驚愚駭俗佇有聞焉嗚呼姜
氏懷安之規旣聞之矣畢萬名數之慶可稱也哉篋有遺
經匣藏傳劍積茲餘慶必有揚名愚方遁跡邱園游心墳
素前耕後餉并食易衣不忤不求道誠有在自媒自衒病

或未能雖呂範以久貧幸治長之無罪昔公愛女今愚病
妻內動肺肝外揮血淚得仲尼三尺之喙論意無窮盡文
通五色之毫書情莫既嗚呼哀哉公其鑒之

祭處士十二房叔父文

謹按房字上應
有十二二字

某爰在童蒙最承教誘違訣雖久音旨長存近者以檀山
舊塋忽罹風水壽堂圯壞冢樹凋傾雖崩則不修聞諸前
哲但墜而罔治那俟他人况隱德貽芳鴻儒著美豈可令
趙岐之表墊彼元扃郭泰之碑淪於夜壑載惟瑛瑁藐爾
孤冲誠叫號之不停顧營辦之無素某等輒考諸著筮別

卜邱封使義叟以今日吉時奉移神寢奢無僭緡儉免虧
疎是期永闕尊靈長安幽窆眠牛有慶自及於諸孤白馬
垂祥豈均於猶子追懷莫及感切徒深更思平昔之時兼
預生徒之列陸公賜杖念榮益以何成殷氏著文媿獻酬
而早屈引進之恩方極禍凶之感俄鍾誰言一紀之餘又
奉再遷之兆哀深永往情極初聞矧宗緒衰微簪纓殆歇
五服之內一身有官將使澤底名家翻同單系山東舊族
不及寒門靜思肯構之文敢怠成書之託城等旣幽明無
累年志漸成則當授以詩書諭其婚宦使烝嘗有奉名教

無虧靈其鑒此微忱助夫至願敢以求於必大庶免歎於
忽諸迫以哀憂兼之瘵恙曾非遐遠不獲躬親瀝血裁詞
叩心寫懇長風破浪敢忘昔日之規南巷齊名永絕今生
之望冀因薄奠少降明輝延慕酸傷不能堪處苦痛至深
永痛至深

祭韓氏老姑文

猗歟我家世奉元德讓弟受封勤王賜國名芳彝鼎勲盈
史冊季孟國高秦晉樂邵恭惟柔範載稟淵塞旣作女師
乃爲嬪則潁水波清梁園月明言旋百兩且拜雙旌訖侯

令弟配國名卿入從述職出輔專征螽斯不妒鳳凰和鳴
此時同慶東郡分榮使者責梁公子專魏帝念元昆人思
仲氏杖節赴敵斬芻盡瘁無以家爲或從王事禮優內子
詩美夫人昆絃瑱統山蕨澗蘋子元罕見冀缺如賓綠衣
有感翟茀仍新遽歎夜川端聞晝哭原阡舊署孟鄰斯卜
閒居獻壽作賦之官弓裘望襲菽水承歡福善餘慶好謙
舊祉復自良人集於之子爰從上蔡去臨易水空報登壇
未聞曳履鼂父先歸莫之能比趙母上言蓋不得已寒暄
結患燥濕爲疵徒虛百祿靡效三豎嗚呼壽夭所賦彭殤

不移誰能了悟孰不憂悲何茲達識乃克先知同易簣以
就正如買棺而指期苟有所累安能及斯道遠輟轅程遙
河洛建旄臨塗移舟就壑日慘林嶺風淒灌薄積藹茫茫
行烟漠漠某等誠深通舊情協先親始自童子至於成人
年將二紀恩冠六姻念升堂之如昨慟幽夜之無晨歌停
行路春輟比鄰雖寓辭之有所終含酸而莫伸壺清媿耐
俎薄羞芹惟餘彤管有美清塵嗚呼尚饗

祭徐姊夫文

嗚呼以君之文學以君之政術幼以自立老而不倦亦可

以爲君子人矣君子人歟而不卽清途不階貴仕此其命也夫何慊焉始者仲姊有行獲託貴族半產以資於外姓閨門寄託於仁人將以衰微倚爲藩援不圖薄佑天奪初心仲姊凋殂諸甥不育以親以懿翻爲路人再號再呼莫訴蒼昊尚以君子存伉儷之重敦行李之私二十年以來雖事睽而意通跡遙而誠密神當賜鑒愚豈敢忘逮愚不天再丁凶釁泣血偷息餘生幾何君方赤紱銀章淞東從務道途悠邈時序徂遷訝弔緘之不來忽訃書之俱至感舊懷分情如之何埋玉焚芝固未可喻嗚呼今來古往人

誰不亡於君之亡其酷斯甚藐然一女纔已數齡乞後旁
宗又未能立賢弟扶服東路遇疾洛師徘徊十旬淹不得
進浮泛水陸厥途四千建旄云歸曠然無主尼姑居宗老
之地騶奴總家相之權獲及故阡信爲餘慶其所以爲附
身附棺之具又豈礙平生之曠達邪日月次遷卜筮斯協
幽明之異始於今辰愚方纏哀憂瘵恙縻寢不及一攀冢
樹一慟荒阡謝澹成之交申永訣之禮矧余仲姊君其與
歸撫心骨以皆驚披血淚而無算嗚呼已哉其何言耶襚
衣非華奠物殊薄靈其鑒此慰我哀心嗚呼尚饗

祭徐氏姊文

嗚呼追訣慈念一十八年罪積行違上下無禱天怒猥集
不誅其身再丁憫凶藐無怙恃號潰荼裂心摧骨崩獲見
諸甥來奉遷合舊物半同於泥滓新阡方列於松楸斷手
折足厥痛非擬終天沒地此誠莫伸冤痛蒼天孤苦蒼天
始某兄弟初遭家難內無強近外乏因依祇奉慈顏被蒙
訓勉及除常制方志人曹以頑陋之姿辱師友之義獲因
文筆實忝科名三千有司兩被公選再命芸閣叨跡時賢
仲季二人亦志儒墨於顯揚而雖未在進修而不隳永惟

幽靈盡亦垂鑒今者苴麻假息糞土偷存不卽殞傷蓋亦有以伏以奉承大族載屬衰門三弟未婚一妹處室息允猶闕家徒索然將恐烝嘗有曠闕之憂邱隴絕芟除之主延駐晷刻不敢自私又以祖曾之前未一完兆骨肉之內猶有旅魂將自來茲克用通便以顯之義雖不敢望無忝之訓庶幾或存靈其聞之必將加憫然有以沒齒懷恨粉身難忘者以靈之懿茂而不登遐壽不生賢人使別女致哀猶子爲後哀哀天地云胡不仁默默神祇其何可訴今嵩與二子旣爲我甥誓當撫之以慰幽抱男勸其學使得

錄仕女求其耦必擇賢良縱乖宅相之徵庶泯忽諸之歎
壽堂宿啟潛舟旣移那期永訣之悲復見重開之兆以祥
忌云近哀憂載迷不獲臨壙達誠撫柩致奠東望景毫椎
心仆身具襚擇蔬灑以淚血日慘風遠叫號無聲伏惟明
靈一賜臨鑒孤苦蒼天不孝蒼天

祭裴氏姊文

嗚呼哀哉靈有行於元和之年返葬於會昌之歲光陰迭
代三十餘秋得不以旣筭闕廟見之儀故卜吉舉歸宗之
禮不幸不佑天實爲之椎心泣血孰知所訴恭惟先德實

紹元風良時不來百里爲政愛女二九思託賢豪誰爲行
媒來薦之子雖琴瑟而著詠終天壞以興悲謂之何哉繼
以沈恙禱祠無冀奄忽凋違時先君子以交辟員來南轅
已轄接舊陰於桃李寄斃殯之松楸此際兄弟尚皆乳抱
空驚啼於不見未識會於沈冤淞水東西半紀漂泊某年
方就傳家難旋臻躬奉板輿以引丹旌四海無可歸之地
九族無可倚之親旣祔故邱便同逋駭生人窮困聞見所
無及衣裳外除旨甘是急乃占數東向傭書販春日就月
將漸立門構清白之訓幸無辱焉旣登太常之第復忝天

官之選免跡縣正刊書秘邱榮養之志纔通啟動之期有
漸而天神降罰艱棘再丁弱弟幼妹未笄未冠允緒猶闕
家徒屢空載惟家長之寄偷存晷刻之命號天叫地五內
崩摧然亦以靈寓殯獲嘉向經三紀歸祔之禮闕然未修
是冀苟全得終前限屬劉孽叛換逼近懷城懼罹焚發之
災永抱幽明之累遂以前月初吉攝線告靈號步東郊訪
諸耆舊孤魂何託旅櫬奚依垂興欲墮之悲幾有將平之
恨斷手解體何痛如之灑血荒墟飛走同感伏惟朝夕二
奠不敢久離遂遣義叟一人主張啟奉抱頭拊背戒以信

誠附身附棺庶無遺闕檀山滄水實惟我家靈其永歸無
或栖寓嗚呼哀哉靈沈縣之際殂背之時某初解扶牀猶
能記面長成之後豈忘遷移頃者以先妣年高兼之多恙
每欲諮畫卽動悲感涕泣旣繁寢膳稍減雖云通禮亦所
難言荏苒於斯非敢怠忽今則南望顯考東望嚴君伯姊
在前猶女在後克當寓卽歸養幽都雖歿者之宅兆永安
而存者之追攀莫及又以十二房舊域風水爲災胡子彭
兒藐焉孤小雖古無修墓著在典經而忘禮約情亦許通
變今則已於左坎別卜鮮原重具棺衾再立封樹通年難

遇同月異辰兼小姪寄兒亦來自濟邑駭魂稚魄依托尊
靈遠想先域之旁纍纍相望重溝壑陌萬古千秋臨穴旣
乖飲痛何極唯安陽祖妣未祔仍世遺憂昨本卜孟春便
謀啟合會雍店東下逼近行營烽火朝然鼓鼙夜動雖徒
步舉觀古有其人用之於今或爲簡率潞寇朝弭則此禮
夕行首夏已來亦有通吉儻天鑒孤藐神聽至誠獲以全
茲免負遺託卽五服之內更無流寓之魂一門之中悉共
歸全之地今交親饋遺朝暮饘餼收合盈餘節省費耗所
望克終遠事豈敢溫飽微生苟言斯不誠亦神明誅責老

舊僕使纔餘兩人靈之組繡餘工翰墨遺跡並收藏篋笥
用寄哀傷嗚呼哀哉葬天當年骨還舊土箕帚尋移於繼
室兄弟空哭於歸魂終天銜冤心骨分裂胞胎氣類寧有
舊新叫號不聞精靈何去寓詞寄奠血滴緘封靈其歸來
省此哀殞傷痛蒼天孤苦蒼天伏惟尚饗

祭小姪女寄寄文

正月二十五日伯伯以果子弄物招送寄寄體魂歸大塋
之旁哀哉爾生四年方復本族既復數月奄然歸無於鞠
育而未深結悲傷而何極來也何故去也何緣念當稚戲

之辰孰測死生之位時吾赴調京下移家關中事故紛綸
光陰遷貿寄瘞爾骨五年於茲白草枯荻荒塗古陌朝飢
誰飽夜渴誰憐爾之栖栖吾有罪矣今吾仲姊返葬有期
遂遷爾靈來復先域平原卜穴刊石書銘明知過禮之文
何忍深情所屬自爾沒後姪輩數人竹馬玉環繡襜文褕
堂前堦下日裏風中弄藥爭花紛吾左右獨爾精誠不知
何之况吾別娶已來嗣緒未立猶子之誼倍切他人念往
撫存五情空熱嗚呼滎水之上檀山之側汝乃曾乃祖松
檟森行伯姑仲姑冢墳相接汝來往於此勿怖勿驚華綵

衣裳甘香飲食汝來受此無少無多汝伯祭汝汝父哭汝
哀哀寄汝知之耶